



GLION Nadal en Claustra dominicana

(fmr/gc) L'enconuschenta stalla da Nadal – cun figuras da sora Anita Derungs – sa buca vegnir exponida e mussada uonn ella baselgia claustrala a Glion. E tuttina san ins visitar leu la stalla virtualmein sut www.klosterilanz.ch.

«Mias figuras dalla stalla da Nadal ein vegnidas creadas per selegrar, meditar e seprofundar en famiglia davart il misteri da Nadal. Ellas ein in schenghetg allas famiglias el Grischun e sigl entir mund», ha sora Anita Derungs giu detg inaga en ina intervista.

Avon zacontas jamnas ei sora Anita morta e sia Gruppa vegn deplorablamein buca pli a crescer. La singulara stalla da Nadal da sora Anita vegneva visitada onn per onn. Figuras dil vegl testament sco Abraham, s. Gion Battesta, l'Annunzia-

ziun a Maria, s. Giusep e la naschientscha ella stalla a Betlehem ein vegnidas fatgas el decuors da varga 50 onns, admiradas fetg e visitadas stedi.

Uonn denton restan las portas dalla Claustra e dalla baselgia claustrala serradas per schurmegiar la cuminonza claustrala. L'entira stalla da Nadal cun las figuras sa buca vegnir mussada, mobein mo ina pintga part.

Per denton buca stuer renunziar alla fascinaziun dall'entira historia da Nadal han las soras dominicanas da Glion schau dar el tgau zatgei special. Sora *Madlen Büttler* OP resda silla website dalla Claustra da Glion las historias davart las figuras dalla stalla, meina tras quella, ch'ei illustrada cun bellezza fotos dad *Iso Tuor*. Aschia san interessai entrar el mund dalla stalla da Nadal cun figuras da sora Anita e tedlar la historia dalla naschientscha da Jesus era lunsch ordeifer la baselgia claustrala.

Las soras da Glion giavischan a tuts carstgauns dalunsch e damaneivel in benediud Nadal.



Ina dallas figuras da sora Anita ord la stalla da Nadal.

MAD